



Mattas e mats da la pcd giuvna grischuna cun cussegliera federala Doris Leuthard.

FOTOS G. N. STIGIER

«Vus essas la futura elita da la pcd»

Cuira: Festa 30 onns pcd giuvna grischuna

DA GION NUTEGN STIGIER / ANR


■ Ina cussegliera federala da buna luna, gratulantas e gratulants en rotscha e giuvnas e giuvs che han stimà la bainvuglientscha da tuts per il giubileum da lur partida. Quai ina resuma-ziun curta da l'occurrènza che ha gi lieu en l'auditorium da la Banca chantaunala. In anniversari radund è bain ina raschun da far festa e quai han mattas e mats ch'appartegnan a la pcd giuvna grischuna cun lur numerus giasts er fatg tar la festa da giubileum en la chapitala da noss chantun. Cussegliera federala Doris Leuthard è bain stada la pli prominenta tranter ils blers gratulants, dentant da la partida è bunamain stada la «crème de la crème» da la pcd dal Grischun. En ses pled da bainvegna ha Reto Cramer, in dals presidents da la pcd giuvna grischuna, ditg che en l'avegnir haja la pcd da focussar sin las forzas politicas da mez e betg dretg ubain sanester. En l'avegnir haja la pcd pli e pli da

s'orientar a la politica dals giuvenils e procurar che uffants e biadis sajan en il center da la politica. Severin Geisseler, l'ulteriur president da la pcd giuvna grischuna, ha fatg ina bilantscha dals davos 30 onns da la partida giubilara. La pcd giuvna grischuna saja en noss chantun quella partida che saja la pli ferma dals giuvs. Ella haja diversas giadas er gi ina atgna glista tar las elecziuns per il cussegl nazional e contribuì cun quai che er autras partidas hajan introducì ina glista cun giuvs candidats. Ultra da quai haja la pcd giuvna grischuna er adina puspè influenzà cun success votaziuns chantunals, ha menziunà Severin Geisseler.

Las partidas da giuvs en indispensablas

Cussegliera federala Doris Leuthard ha ditg en ses pled che las partidas dals giuvs sajan in vair chapital per la pcd. Cunzunt la pcd giuvna grischuna saja indispensabla cun esser en Svizra la pli acti-

va da tuttas. «Vus essas la futura elita da la pcd e da quai dastgain nus esser loschs», ha accentuà l'aut giast da Berna. La fin finala saja reussi a la pcd giuvna grischuna da tarmetter cun Martin Candinas in giuven cusseglier nazional en il parlament svizzer e quai saja in vair success. Ultra da quai lavurian ils giuvs ferm per chattar bunas soluziuns ed en quella chaussa giavischass ella dapli schlantsch da sia partida. Cussegliera federala Doris Leuthard ha lura er nizzegià l'occurènza da far reclama per la votaziun dals 24 da november da quest onn, ditg pli concret per la votaziun da l'auzament dal pretsch da la vignetta autostradala da 40 francs sin 100 francs. Il Grischun profiteschia la fin finala tuttina da passa 11 milliuns francs sche quella votaziun vegnia acceptada. Gratulà a la giubilara han dentant er anc autras personas da num e pum da la pcd e tuttas han giavischà a la pcd giuvna grischuna vinavant success e ch'ella possia prosperar er en l'avegnir.



Ils dus presidents da la pcd giuvna grischuna cun la cussegliera federala: Reto Cramer, Doris Leuthard e Severin Geisseler (da san.).



Ina discussiun viva tranter Roland Tremp, Stefan Engler e Doris Leuthard (da san.).



La cussegliera federala (dretg) salida in giuven commember da la pcd giuvna grischuna. Sper Doris Leuthard Elita Florin-Caluori, l'antieriura presidenta dal cussegl grond.



La cussegliera federala ha nizzegià l'occurènza da discurre cun blers preschents: Doris Leuthard, René Hefti, Martin Candinas e Gabriela Tomaschett-Berther (da san.).



Marcus Caduff, schef da fracziun da la pcd, flancà d'Anita Decurtins, deputada suppleanta e Silvia Casutt-Derungs, deputada.



Dumeni Columberg, anteriur cusseglier nazional, Doris Leuthard, cussegliera federala e Luregn Matthias Cavelti, anteriur cusseglier dals chantuns.



Deputà Maurus Tomaschett e cussegliera federala Doris Leuthard.